

Premi per la canorta Lumpazi a Mustér

La canorta Lumpazi a Mustér survegn il premi principal dalla Fundaziun Pestalozzi ch'ei dotaus cun 20 000 francs. La purschida ei fetg tschercada, actualmein datti perfin ina gliesta da spetga.

RTR/FMR

Per la 5avla gada vegn surdau il premi per la promoziun tumpriva d'affons en regiuns da muntogna. 11 instituziuns eran annunziadas – ed or da tschun ha ina giuria tscherniu la canorta Lumpazi a Mustér pil premi principal. Quel ei dotaus cun 20 000 francs. Il mument tgira la canorta Lumpazi ch'ei dat dapi 10 onns en tut 63 affons (inclusiv meisa da miezgi). Per l'emprema gada hagien els uss era ina gliesta da spetga pils affons.

Quei muossi bein che la purschida ei tschercada ed apprezzada. Quei eri all'entschatta auter. Lura devi sceptica surtut perquei ch'ins enconuscheva buca la purschida ed er las tattas ed ils tats hagien resentiu quei sco concorrenza, mo uss seigi la purschida acceptada, di la comenadra *Laura Giorgio*.

Canorta sco patrun da lavur impurtont

Cun en tut nov emploiadas ei la canorta Lumpazi quasi in'interpresa da grondezia mesauna ella regiun. La stad vargada hagien ins aunc engaschau persunas supplementaras, aschia ein il mument duas giuvnas en scolaziun e sis ein emprendidas, mo quei tonschi buc, di Lisa Giorgio. «Nus havein adina schon giu certas difficultads dad anflar personal, perquei che nus essan ina regiun periferica ed era lunsch naven da Cuera, nua che las persunas fan igl emprendissadi».

Cun ils daners che vegnan dal premi Pestalozzi veglian els sustener il fondo communabel cun la grupp locala da Lions. Or da quest fond vegnan daners per famiglias che pon buca purtar ils custs per la canorta, di Lisa Giorgio. In'otra part dils daners seigi per la scolaziun dil personal e la finala veglian els er cumprar novs termagls.

Premi da reconuschienscha er per outras canortas el cantun

In premi da reconuschienscha dalla Fundaziun Pestalozzi, dotau cun 5000 francs, survegn il center da sentupada da famiglias a Churwalden, la Kita Luerluogi en Val San Pieder, e la grupp da giugar e da gaud en Valragn.